

Nunatta avataanniit timmisartukkut Kalaallit Nunaannut angalanermi piumasaqaatit pillugit Namminersorlutik Oqartussat nalunaarutaat (Immikkoortoq 1)

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20 12. november 2001 -imeersumi, Nappaatit tunillaassortut akiorniarlugit iliuutsit pillugit

Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 6 a, 12 a, 12 b, 12 c, 21 a aamma 21 b aamma § 29 imm. 2 malillugit aalajangersarneqarpoq:

Nunami oqartussaaffigisami atuuffii

§ 1. Nalunaarut Kalaallit Nunaata nunataani atuuppoq.

Atuuffia

§ 2. Inuit danskisut innuttaassusillit aamma inuit Islandimiutut innuttaassusillit §§-ni 5, 6 aamma 8-mi ilaatinneqanngillat, taamaattoq imm. 2 aamma 3 takukkit.

Imm. 2. Imm. 1-imut ilannguttoqarniarpat inuup Savalimmiuniit Islandimiilluunniit toqqaannartumik tikinnissaa aamma Kalaallit Nunaannut aallarnissaaq sioqqullugu Savalimmiuni Islandimiluunniit ulluni 14-
ini najugaqartarsimanissaa piumasaqaataavoq. Tamanna aamma Savalimmiuniit Islandikkut Kalaallit Nunaannut angalasimasunut imaluunniit Islandimit Savalimmiukkut Kalaallit Nunaannut angalasimasunut atuuppoq.

Imm. 3. Danskisut Islandimiutullu innuttaassusillit Kalaallit Nunaanniit toqqaannartumik Islandilianngikkunik Savalimmiunukartut nunani taakkunaniiginnassagunik kingusinnerusukkullu toqqaannartumik Kalaallit Nunaaliartut imm. 1-imut aamma ilaatinneqarput. Taamatuttaaq Kalaallit Nunaanniit Islandimut Savalimmiunullu angalasimasunut imaluunniit Kalaallit Nunaannit Savalimmiunut Islandimullu angalasimasunut tamanna atuuppoq.

§ 3. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutinneqassanngitsut aalajangerneqarsinnaavoq.

Imm. 2. Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

Imm. 3. Inunnut Issittumi Sakkutooqarfimmi sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

Imm. 4. Inunnut Peqqinnissaqarfimmi sulisunut Nunatsinni Nakorsaaneqarfik imm. 1 naapertorlugu aalajangiisassaaq.

Imm. 5. Inunnut immikkoortuni 2-4-mi taaneqanngitsuni sulisunut Nunatsinni Nakorsaaneqarfik imm. 1 naapertorlugu aalajangiisassaaq. Tamatuma saniatigut Nunatta Nakorsaaneqarfia qinnuteqareernikkut inunnut inuiaqatigiinni pinartumik suliaqanngitsunut § 8-mit immikkut akuersissuteqarsinnaavoq.

Imm. 6. Nunatsinni Nakorsaaneqarfiup nalunaarummi matumani aalajangersakkat ilaat tamaasaluunniit peqqinnissaqarfimmi katsorsarneqartunut atuutinneqassanngitsut aalaj angersinnaavaa.

Imm. 7. Angalasut laboratoriami nakorsaanermit akuerineqartut ilaanni Covid 19-imut akiuussutissanik kapineqarsimallutik uppersarsarsinnaappassuk §§ 6, 8 aamma 9-mit mininneqarnissaannik Nakorsaaneq aalajangiisnaavoq. Angalasut aallarnissaq sivikinnerpaamik ullunik tallimanik sioqqutsillutik uppersarsaatissanik nakorsaanermit nassiussissapput. Immikkut akuersissuteqarnissaq akuersissutigineqarpat qinnuteqartoq aallartinnani allakkatigut uppersarsaammik nakorsaanermit tunineqassaaq.

Imm. 8. Meeqqat 12-t inorlugit ukiullit §§-ni 6 aamma 9-mi ilaatinneqanngillat. Meeqqat 12-t inorlugit ukiullit ingiaqatitillusooq § 8-mi aalajangersakkat malissavaat.

Sapaatip akunneranut Air Greenland aqutigalugu avataanniit tikissinnaatitaasut amerlanerpaaffiat

§ 4. Coronamut allattoqarfik Kalaallit Nunaannut Air Greenlandimut ilaallutik sapaatip akunneranut amerlanerpaat tikissinnaasut pillugit Air Greenlandimut nalunaaruteqassaaq.

Timmisartortitseqatigiit allat assigisaallu nunatsinnut angalatitsisarnerannut piumasaqaatit

§ 5. Timmisartortitseqatigiit allat assigisaallu, Air Greenlandiuungitsaq, Kalaallit Nunaanni millutik timmisartukkut angallassiniartut Corona pillugu allatseqarfimmit Kalaallit Nunaannut angallassinissamut qinnuteqassapput.

Timmisartumi Kalaallit Nunaanni mittussami ilaasunut piumasaqaatit

§ 6. Angalasut Covid-19-imik nappaateqannginnerminnik uppersarsaatimik takutitsisut kisimik timmisartumut Kalaallit Nunaannut mittussamut ilaaqqusaapput. Oqaaseqatigiit siulliit eqqortinnissaannut timmisartortitseqatigiiffik akisussaavoq.

Imm. 2. Covid-19-imut misissugassamik napparsimmavimmi peqqissaavimmiluunniit allaniluunniit Nunatsinni Nakorsaaneqarfiup akuerisaani tiguisoqassaaq.

Imm. 3. Covid-19-imut misissortinnermi piumasarineqartut Nunatsinni Nakorsaaneqarfimmit aalajangersarneqartut naammassineqarsimassapput.

Imm. 4. Imm. 1 -imi aalajangersakkanik malinninnginnissaq pillugu Nunatsinni Nakorsaaneqarfik aalajangersaasinnaavoq.

Avataanniit angalasut nalunaartussaataitanerat

§ 7. Angalasut Immersugassaq Sumut-mik immersuisimasut kisimik timmisartumut Kalaallit Nunaannut mittussamut ilaaqqusaapput. Angalasoq timmisartumi sulisumut Immersugassaq Sumut-mik immersuisimanermut nassiussisimanermullu uppersarsaammik takutitsissaaq. Oqaaseqatigiinni siullermi aappaannilu taaneqartut eqqortinnissaannut timmisartortitseqatigiiffik akisussaavoq.

Kalaallit Nunaannut tikereermermi malitassat

§ 8. Inuit timmisartukkut Kalaallit Nunaannut tikittut Covid-19-imik tunillanneqarsimannginnertik uppersarsaqaarnagu aaqquissuussanut, nalliuttorsiornermut, sammisaqartitsinerit assigisaanulluunniit peqataaqqusaanngillat. Matumani illup iluani, silami, pisortat inuillu katerittarnerat, aaqquissuussinerit pisussallu il.il. ilaatinneqarput.

Imm. 2. Pisortat suliffeqarfutaani assigisaanilu isersimanermut, inuussutissarsiortut inigisaanni tamanut ammasuni isersimanermut aamma pisortat namminersortullu utoqqarnik paaqqinnittarfinut napparsimavinnulluunniit isersimanermut inerteqqussut aamma atuutinneqassaaq. Taamaattoq ulluinnarni nioqqutissanik pisiniarnerit allatullu pisariaqavissumik pisiniarnissat allanit isumagineqarsinnaanngitsut isumaginissaat akuerineqarput.

Imm. 3. Peqataasut taamaallaat inoqutigiuppata imm. 1 inissiamut atuutissanngilaq.

Imm. 4. Immikkoortut 1 aamma 2 katersuunnernut politikikkut allatulluunniit isummersornissamik siunertalinnut atuutinngillat.

§ 9. Inuit § 6-imi pineqartut Kalaallit Nunaannut tikereernerup kingorna ullut tallimassaani kingusinnerusukkulluunniit Covid- 19-imik napparsimanermut misissortinneqarsinnaapput.

Imm. 2. Misissuinermermi nappaammik nassaartoqanngippat misissorneqartoq Covid-19-imik tunillatsinneqarsimanngitsutut naatsorsuutigineqassaaq, taamaammallu § 8-mi inerteqquteqarnermut ilaanani.

Imm. 3. Misissuinermermi nappaammik nassaartoqarpat inuk pineqartoq tamanna pillugu malittarisassat nalinginnaasut malillugit katsorsarneqalissaaq, takuuk Nappaatit tunillaassortut akiorniarlugit iliuutsit pillugit Inatsisartut peqqussutaat.

Imm. 4. Inuk Covid-19-imik nappaateqarnermut misissortinngippat § 8-mi inerteqqussut Kalaallit Nunaannut tikinnermiit ulluni 14-ini atuutissaaq. Inuk Kalaallit Nunaannut tikinnerminut ullut 14-it sinnerlugit Covid- 19-imik nappaateqarnermut ersiuteqarsimanngikkuni Covid-19-imik tunillatsinneqarsimanngitsutut naatsorsuutigineqassaaq.

Imm. 5. Inuk Kalaallit Nunaannut tikinnerminut ullut 14-it kingorna Covid-19-imik nappaateqarnermut ersiuteqaruni tamanna pillugu malittarisassat nalinginnaasut malillugit katsorsarneqalissaaq, takuuk Nappaatit tunillaassortut akiorniarlugit iliuutsit pillugit Inatsisartut peqqussutaat.

Pineqaatissiissuteqartarnerit

§ 10. §§ 4 aamma 5, § 6 imm. I aamma §§ 7 aamma 8-mik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsisilerinermi inuttut immikkoortutut isigineqartut)
pinerluttulerinermik inatsimmi kapitali 5-imi malittarisassat malillugit pinerluttulerineq pillugu
inatsiseqartitsinikkut akisussaatinneqarlutik pineqaatissinneqarsinnaapput.

Atuutilerfia

§ 11. Nalunaarut ullormi 17. juni 2020, nal. 16:00 atuutilissaaq. Peqatigitillugu Nunatta avataanniit
timmisartukkut Kalaallit Nunaannut angalanermi piumasaqaatit pillugit Namminersorlutik Oqartussat
nalunaarutaat nr. 18, 15. Juni 2020-imeersoq (Immikkoortoq 1) atorunnaarsinneqassaaq.

Imm. 2. Nalunaarut malillugu killilersuinerit, inerteqquteqartitsinerit, peqqusinerit il.il. 6. juli 2020
tikillugu atuutissapput.

Namminersorlutik Oqartussat, ulloq 17. juni 2020

Anna Wangenheim

/

Tine Pars

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut